



PRIMEIRO MINISTRO

VII Governu Konstitusionál Reafirma Apoiu Inkondisionál ba Xefe Negosiadór, Sr. Kayrala Xanana Gusmão Lidera Negosiasaun Kona-ba Fronteira Marítima no mós Dezenvolvimentu mina ho gás iha Tasi Timór

Díili, 07 Novembru 2017

Xefe VII Governu Konstitusionál, Primeiru Ministru Dr. Mari Alkatiri, ne'ebé fila hikas husi Austrália iha loron-06 fulan-11 tinan-2017 hafoin vizita de traballu loron rua iha Perth, Austrália Osidental, responde ba jornál The Australian ne'ebé publika sala notísia ida hodi sujere diverjénsia entre Governu ho ekipa negosiasaun ba Fronteira Marítima lideradu husi Xefe Negosiador Sr. Kayrala Xanana Gusmão, relaciona ho fatin atu prosesa gás husi Greater Sunrise.

The Australian Business Review, publikadu iha loron 6 fulan novembru tinan 2017, ho título ho lian inglés “Sunrise hopes rise as talks begin”, husi jornalista Paul Garvey, atribui deklarasaun ida ba Primeiru-Ministru Dr. Mari Alkatiri hodi hatete “Dr. Alkatiri sujere katak [Timor-Leste] preparadu atu tetu se gás husi Greater Sunrise bele ba prosesa iha Austrália hodi nune'e bele ultrapassa impasse[.]”

Responde ba artigu ida ne'e, Primeiru-Ministru hatete katak reportajen ne'e laiha fundamentu no publika lalos kona ba saida maka Primeiru-Ministru hatete ba jornalista no dook husi ninia kontestu.

“VII Governu Konstitusionál sempre reafirma ninia pozisaun kona-ba kestaun fronteira marítima. Iha ha'u nia diskursu iha Primeiru Ministru Malcolm Turnbull nia oin rasik ha'u hatete katak Timor-Leste tomak, husi Gabinete Prezidente da República to'o iha aldeia ki'ik-oan liu iha foho, hotu-hotu hamutuk ho objetivu ida de'it no apoia inkondisionálmente esforsu xefe negosiadór Kayrala Xanana Gusmão nian,” Primeiru-Ministru hatete.

Durante ninia estadia iha Australia, Primeiru Ministru hasoru malu mos ho parseiru sira ne'ebé desenvolve gazodutu iha Tasi Timor no esplika, “ha'u hatete ba ita-nia parseiru sira katak, Xanana Gusmão mak sei negosia ho sira kona-ba gazodutu ne'e, i klaru, ita mantén firme iha ita-nia pozisaun katak gazodutu ne'e tenke dada mai Timor-Leste.”

Koalia durante konferensia imprensa iha aeroportu Presidente Nicolau Lobato, wainhira fila hikas husi vizita ba Australia, Primeiru Ministru hatete ba jornalista sira katak iha loron-07 fulan-Novembru, Xefe Negosiador Timor-Leste nian sei hasoru malu ho parseiru sira iha Australia hodi koalia kona ba dezenvolvimentu kampu Greater Sunrise no mos katak Primeiru Ministru depozita ninia komfiansa no apoiu tomak iha Sr. Kayrala Xanana Gusmao iha negosiasaun ho parseiru sira.

Ho instrusaun husi Primeiru-Ministru, Gabinete Primeiru-Ministru mós prepara ona karta ida ba jornál The Australian hodi husu atu jornál ne'e imediatamente rektifika publikasaun la lós ne'e.

REMATA

Ba informasaun liu tan, kontaktu Porta Voz Governu Sr. Mathias Boavida, Tel; 7723 0770 ou Sr. Alex Tilman Tel; 78520005